

重修兩淮鹽法志

兩淮鹽法志卷五十四

轉運門

淮南借運鄰鹽

淮南未改票之先楚岸厄於火商困極矣不數年而又
有粵賊之禍東南糜爛舟車不通疆吏張皇補苴乃借
鄰鹽以濟民食設局抽稅以給軍餉禁網大開上下交
益於是川鹽潞鹽粵鹽分售於大湖南北而江西亦借
閩浙粵東之鹽因勢乘便以收一時之利固謀

國者之苦心也其奏疏所論或行或不行抑亦當世得失之
林歟志借運鄰鹽

楚岸借運鄰鹽

咸豐三年二月湖廣總督張亮基奏湖北一省除施南一府六縣及宜昌府屬之鶴峯長樂二州縣例食川鹽其餘州縣例食淮鹽由儀徵溯江而上經江南安徽各州縣境入楚自粵逆竄擾江路梗塞轉運不前票商裹足鹽船潛蹤小民無從購買淡食堪虞若不籌議變通徒滋私梟攘奪之風小民困弊日甚地方情形將更有不忍言者臣等前准幫辦軍務雲貴督臣羅繞典移咨奉
上諭見在淮鹽阻滯著准其以川鹽潞鹽接濟迅卽咨部辦理
俟賊氛掃蕩仍復舊規等因欽此臣等當會籌辦理查湖北

迤北襄鄖一帶與潞鹽引界相近迤西荆宜一帶與川
鹽引界相近東北羅田麻城黃安一帶與淮北引界相
近當此淮南片引不到之時亟籌裕課便民之策自非
借銷鄰引不能然於權宜辦理之中求其變通盡利則
無有如借銷川引之善者潞鹽由豫入楚水陸舟車腳
費甚鉅淮北引鹽由安徽北境陸路入楚山嶺重疊轉
運殊難且淮北山西程途遙隔緩不濟急惟川鹽由船
裝運從長江上游順流駛下由沙市漢口分運各府州
縣口岸水路處處可通鹽質既良腳費又省轉運既易
成本又輕較之借銷潞鹽淮北鹽其便利相去何啻霄

壞但自賊匪竄擾漢口票販及各巨商大賈久已逃避
他方此時招商領運無人承辦業經委員設法招集尙
無回楚確耗而民食又萬難刻緩見在司道庫正雜各
項俱已蕩然無存籌辦官運又苦成本無從設措仰懇
敕下四川督臣飛飭鹽茶道借撥川鹽二千引仍照川碯川包
趕緊委員雇船裝載運至巫山由楚省委員設局驗收
押運來楚以濟急需至應納鹽引正課及川省成本水
腳委員薪水等項均由湖北鹽道督同委員按引提存
解交四川臣等斷不任稍有稽延貽累鄰省所有設卡
緝私到岸發賣各節已飭藩臬兩司鹽道協心妥議再

爲核定一俟賊氛掃蕩江路廓清卽仍改食淮鹽以符定例事由官辦欲止卽止不致開後來浸灌之端見在食鹽短絀已極民間迫不及待臣等一面奏明請

旨一面飛咨四川督臣迅速借撥引鹽委員解楚暫資接濟得旨允行

咸豐三年五月湖廣總督張亮基奏上年淮引中梗民苦淡食前在湖南巡撫任內請借粵鹽以濟民食嗣臣蒙恩署理湖廣總督因湖北食鹽絀乏奏請借銷川引均先後奉旨准行各在案茲據廣東咨覆單內每包一百五十斤到樂昌需餉價腳費銀四兩二錢二分七釐零由樂昌至宜章

需水腳銀六錢五分七釐零宜章至郴州需腳費銀四錢九分零湖南應提匣費等項二錢五分七釐又解粵鹽價及南省規費銀二共一錢七分九釐零通計已合銀五兩八錢一分七釐零每斤合銀三分八釐七毫八絲一忽四微照市價扣錢七十七八文不等尙有樂昌收稱運鹽解課設局起倉辛工飯食一切經費均未攤入大約合計發交商販每斤須八十餘文始可無虞虧折商販運銷各處口岸各埠店分售民間每斤又須沾潤數文是民間買食每鹽一斤須錢九十餘文較之見在民間買食粵私市價幾多至一倍有餘此粵東官鹽

難銷之實在情形也川鹽成本課額臣不知其詳昨據四川署督臣來咨在餘引內動支二千張鈐蓋陸引字樣查陸引僅四包較水引斤重不及十分之一湖北全省民食所需區區陸引兩千奚裨百一且據川省鈔示片奏此次採買成本運腳等項約需銀二萬兩計每包須銀十兩將來到楚銷售價值視川私亦昂貴倍蓰此又川省官鹽難銷之實在情形也從來裕課之道莫要於緝私而敵私之方莫先於減價小民計及錙銖萬無舍賤食貴之理商販操贏逐利亦萬無貴買賤賣之理成本輕則民盡食官鹽而課自饒成本重則民爭食私

鹽而課自紉兩湖行銷淮鹽引地最廣今因淮引不至
借銷川粵官鹽是

國家鹽利雖失於淮南猶可收之於川粵如果成本輕減
經理得宜不獨億萬窮民共霑樂利且當此軍需匱乏
搜括無從與其行一切權宜之政擾攘而無補時艱曷
若求調劑之方挹注而可期實濟今川粵兩省官鹽價
值較私鹽貴幾倍餘勢不至驅民食私不止查粵鹽每
一包完庫正款只須銀一兩零九分七釐零而商支外
款則遞加至三兩一錢三分實較正款幾多兩倍川鹽
在本地買食每斤不過十餘文卽外款連腳加至一倍

亦不過二十餘文今

國課不因借銷楚省而議加而各款反因廣銷鄰省而增長是無益於

國而徒有益於商也伏懇

敕下廣東四川督臣飭屬從長計議將商支外款各項大加刪汰務與私鹽價值足以相抵申嚴場竈售私官吏朘削之禁以清其源戶部奏伏思淮南行鹽引地兩湖十居其六鹽課之所入較多則

國課攸關匪細前因淮引不至借運川粵鹽斤本屬權宜之計實爲補救之方若成本過重鹽價因之增貴卽不

免有滯銷之虞推原其故總由一切外支雜費暗長遞加致滋浮冒查粵省之樂昌埠例定成本每包銀三兩四錢五分二釐八毫零今由粵運到該埠共需餉價腳費銀四兩二錢二分七釐零覈與例價不符且粵鹽完庫正款每包尙不及一兩一錢而商支外款每包竟至三兩一錢零末大於本幾及兩倍之多勢必私充官滯應令兩廣總督轉飭大加裁汰以期運楚得銷至湖南委員赴樂昌運至郴州計程不過二百里何以每包需腳價銀一兩二錢零又湖南匣費等項銀二錢五分七釐以上二項均屬浮多應酌加裁減其樂昌收稱設局

辛工等費所擬亦屬過多並令湖廣總督摺節支銷俾價值輕減以期運售迅速又奏稱湖北借運川鹽陸引二千張每引計需銀十兩一節查川省鹽引例無定價惟該省陸引行鹽四百斤徵稅銀二錢七分二釐四毫科則甚輕據原奏稱川鹽在本地每斤不過十餘文卽外款運腳加至一倍亦不過二十餘文上下何至成本需銀十兩顯係官吏商人因鄰省借銷浮加諸費應令四川總督飭屬詳查大加刪減委員趕運赴巫山交楚以濟民食其楚員接運一切腳費亦不得濫行開銷總之節費以輕本減價以敵私均屬目前之要務如果辦

理得宜除此大借運外自無難源源接濟以川粵之溢
銷借補淮課之不足實於

國課民生兩有裨益當此賦課支絀各該督身膺重任務
期同心共濟全局通籌儻各懷此疆爾界之分以致借
運不行鄰私充斥則責有攸歸矣再兩湖淮票不行本
處民販未必不變而爲私販況湖南之桂郴等州湖北
之荊宜等府向爲川粵鄰私所侵灌今因借運兩省引
鹽設或巡防偶疏尤恐私鹽乘虛闖入致撤藩籬應令
兩湖兩廣四川總督嚴飭該屬認真查拏堵緝務令私
梟斂迹不致別滋弊端以利疏銷而肅鹺政

又戶部附片奏據湖廣總督張亮基奏稱湖南北借運鄰鹽其成本均較市價昂貴倍蓰經臣部議令川粵兩省將商支外款大加裁減查官鹽之貴總由官吏巧立名色層層朘削以至末大於本到處滯銷今川粵官鹽昂貴即使按數減半亦僅足以敵私於楚岸淮課絲毫無補是鄰鹽由官借運其無益而難行已可概見查原奏稱湖南郴桂永州湖北荆宜兩府向爲私鹽侵灌今官鹽雖借運而不行則私鹽更暢銷而爭赴藩籬一撤盤踞倍深卽將來江路肅清而兩湖南北亦爲私鹽淵藪非復淮南引地矣恭查本年四月十二日臣部封奏

摺內奉

硃批朕看各督撫一籌莫展動請部撥有平日漫不經心者有避嫌避怨不肯爲者亦有限於定例格於處分不敢爲者前二款惟在各省大吏激發天良惟末一條則在權宜辦理不可拘執見當緊急之時朕必貸其處分寬其定例求事事有實濟也欽此仰見我

皇上臨御臣寮委任而責其成功尤推誠而寬其文法臣等體察湖廣鹽務情形惟在權宜辦理不可拘執蓋由官借運則價貴而不能勝私曷若化私爲官則價平而兼可濟課擬請除川粵已經借運楚省引鹽照臣部所議將

商支外款大加裁減外此後湖南湖北需鹽接濟應仍
明王守仁立廠抽稅之法凡川粵鹽斤入楚無論商民
均許自行販鬻不必由官借運惟擇楚省堵私隘口專
駐道府大員設關抽稅或將本色抽收或令折色輸納
均十取一二以爲定制一稅之後給照放行由各該省
妥立章程奏明權宜辦理總期

國有供軍之實民無淡食之虞資商賈以懋遷化私梟之
頑梗前人成法似可做行惟抽稅則偷漏賣放在在宜
防是在各大吏不拘執不畏難行之自有實濟再查湖
南藩司徐有壬精於籌算相應請

旨飭下湖廣各督撫將楚岸抽稅章程責成該藩司相度機宜
悉心籌辦以求實濟並懇

敕下四川廣東各督撫招徠商販運赴鄰封此項鹽斤既不在
本省引地銷售應令減半完交正課其商支外款不得
絲毫攤派以輕成本得

旨允行

謹按川引運楚至巫山交收其事未行嗣後遵部議
由商販自運來楚赴卡完釐自宜昌以下關卡重疊
部議所謂一稅之後給照放行者亦未盡遵迨同治
六年始歸併各局僅於宜昌完釐一次

咸豐三年禮部尙書徐澤醕奏四川鹽務曾經臣於道光三十年十月間將歷年未繳殘引二十二萬八千餘張嚴行勒限追繳以杜影射行私之弊復將歷年積欠銀銀二十三萬七千餘兩統限十二年完清其從前未行滯引分撥暢銷商岸代行按年代完積欠各在案並裁汰陋規以紓商力自道光三十年至咸豐二年已漸有成效竊維川省鹽務從前滯銷半由於殘引不繳吏役扶同奸商藉以行私半由淮鹽運行兩湖而糧船復夾帶私鹽沿途銷售今淮南之鹽水路阻梗旣不能行運兩湖又無糧船夾帶偷售則川鹽自必大爲暢銷因訪

川省產鹽較旺地方竟有每日所煎鹽斤尙不敷所售者固由經理得宜亦因見在淮鹽不能行兩湖耳當此暢銷之時每年所領額引必不敷用若不嚴禁夾私兼籌裕課則暢銷之利盡歸於下殊非因時制宜之道相應請

旨飭部查明兩湖每年額消引張共有若干並令該督查明見在情形由川江運往兩湖鹽斤既屬踴躍則引不敷用應如何請增引張以濟民食以杜私販並運商夾帶之處詳悉確查據實陳明辦理俟水路無阻兩淮鹽務照常運行卽將所增引張停止以復舊制十二月戶部覆

奏查兩湖額銷淮鹽七十七萬六千六百餘引內毗連
四川之湖北額引五十五萬三千五百餘道見因淮鹽
不到借運川鹽而川省僅借陸引二千張不及百分之
一其爲私充官滯顯而易明該尙書所稱川省產鹽較
旺地方竟有每日所煎鹽斤不敷所售者則額引自不
敷用必當有增引裕課之益顧何以該省見存餘引五
千道尙不能盡數銷售而撥借湖北之引並未及餘引
之半推原其故總由井竈利於得價而售私小民利於
食賤而買私官吏利於賄縱而徇私迨至鄰封借運則
又奇貨可居價值昂貴而遂不足以敵私今欲冀川鹽

之增引裕課當先令川鹽之化私爲官查四川夔州府屬之巫山縣與湖北宜昌府屬之巴東縣壤地相連凡川私船隻順流而下勢不能越巫山而飛渡若於此處扼要設卡專駐道府大員凡遇私販過卡但按正引科則收取稅銀卽便給引放行無論商民均許自行販鬻一稅之後不准胥吏再有絲毫需索違者以贓論此化私爲官之一法也再川鹽產之於井通省原額鹽井八千八百三十三眼按井眼鍋口各分上中下權課是產鹽之盈虛運銷之暢滯一目了然非如海濱之散漫無稽者可比若於井竈旺銷之處酌加引張除正課之外

不再加分毫則商販自必不脛而走此又化私爲官之一法也封疆大吏果能目擊時艱上籌

國課督率屬吏激發天良認真經理自不難於措手該尙書徐澤醕曾任四川總督所奏自係實情應請

旨敕下四川總督裕瑞迅飭鹽道清安泰按照該尙書原奏及臣部指陳各情力求化私爲官增引裕課之法速議章程奏明辦理

咸豐五年十月戶部奏邇年軍興以來餉需浩繁籌撥維艱見在皖楚等省軍務尙未告竣所需軍餉自應設法籌備以期源源接濟因思鹽茶兩項爲天地自然之利

我

朝設有官引茶課較輕鹽課較重每年爲經入一大宗爲目前籌餉計宜行鹽茶互運之法而鹽茶互運可以行之無礙者莫過於湖南浙江兩省查湖南爲產茶之區向來行銷甘肅口外兼運廣東上海等處近年銷路阻滯茶價極賤而所缺者惟鹽自淮鹽不能到岸鹽價倍增湖南每年額銷淮鹽二十二萬餘引見據湖南巡撫駱秉章奏請撥淮鹽十萬引由浙河轉運楚省本日經軍機大臣會同臣部覆奏竊恐十萬引鹽尙不足以供湖南民食而浙省之鹽前據兵部侍郎曾國藩奏請撥

浙鹽三萬引摺內聲稱據浙江巡撫何桂清來咨存鹽
尙多並浙省商人願源興等情願運鹽赴江西銷售等
語是浙省不患無鹽已可概見其茶葉一項本年據浙
江撫臣何桂清勸辦茶捐頗有實濟浙省茶葉銷路之
廣已有明證臣等公同酌議如由浙省運鹽十餘萬引
赴湖南易茶十餘萬道楚省得鹽旣無虞鹽之缺乏浙
省得茶亦無慮茶之難銷至各該省運鹽運茶所需成
本運本等項應令湖南浙江各巡撫設法籌款辦理楚
茶浙鹽彼此運到互換銷售後除去成本運腳引課外
約計必有贏餘應令湖南浙江各省巡撫將鹽茶售價

若干除去一切尙餘若干先行報部查核並將餘銀報部以備半濟京餉半濟江楚軍餉之用其互運之法由湖南巡撫揀派賢能官吏將民間積存之茶收買十餘萬道運赴江西樟樹鎮地方由浙江巡撫籌運鹽十餘萬引揀派賢能官吏亦運赴江西樟樹鎮地方各於起運之前預行知照令鹽茶到鎮時彼此互相接卸湖南運員將茶卸交浙江接運鹽斤回楚分給州縣售銷浙江運員將鹽卸交湖南接運茶葉回浙徑赴上海甯波等處售銷工費旣省勞逸維均實爲兩便惟事屬創始措辦全在得人應請

敕下湖南浙江各巡撫無分畛域協力圖成並卽將辦理章程妥速議奏總之目前軍需緊急不得不變通籌畫俟軍務告竣一切照常辦理

謹按茶鹽互市事未果行

咸豐六年七月湖南巡撫駱秉章奏自粵匪竄擾長江淮運中梗經戶部奏准此後湖南湖北應仿明臣王守仁立厥抽稅之法凡川粵鹽斤入楚擇隘專駐道府大員設關抽稅又准戶部咨湖南之郴桂等州向爲粵鹽侵灌若不講求抽稅之法鹽利歸私豈非可惜據廣西巡撫勞崇光奏議抽收鹽稅章程內稱粵鹽赴楚要路應

如何設關抽稅應由楚省督撫妥議具奏等因咨行到
臣維時粵匪疊次擾及邊疆未能及時籌辦復經戶部
疊次奏奉

諭旨飭催妥議章程迅速具奏經臣遵行據前署鹽法道裕麟
會同藩司文格酌議每鹽一包暫抽稅錢七百文稟由
臣飭委候補知府師映垣候補知縣李熾福前往郴州
宜章二州縣擇要設卡試辦抽稅正擬繕摺覆奏接准
兩廣督臣葉名琛咨據樂桂埠商稟稱樂桂一埠引繁
餉重全賴湖南引地行銷概須船載惟私販則係挑馱
陸運今楚省於郴桂兩屬設卡以船載爲私販以引地

爲越境是粵商先完正課再完課外釐金成本倍增難
期利運陸路私販既無餉課又免釐金獲利愈豐將見
引地悉爲私占粵商每受楚私之苦斷無有將例定界
址置之不問委員赴楚咨臣遴委大員會同粵員查勘
界址勿任郴桂設卡抽釐等因當經臣飭據司道會議
如查有實係在粵納課之官鹽應免抽稅飭令粵委先
行回粵銷差另由楚省查案核辦茲臣檢核疊次部議
參考例案湖南除郴桂等十一州縣外其餘皆係淮鹽
引地自淮鹽中梗民憂淡食借撥粵鹽之請復又難行
戶部始有設卡抽稅之議今粵商仍以郴桂設卡謂湖

南置例定界陞於不問蓋祇知粵鹽行銷粵省引地爲百餘年遵辦之舊章不知粵鹽行銷淮鹽引地乃百餘年未有之創舉郴桂設卡抽稅戶部已有明文屢奉

諭旨准行固非粵商所敢爭亦非湖南置例界於不問此郴桂不得不設卡之定局也查粵私侵楚有由陸路挑運者有由船裝載者究之陸路挑運之私其實皆自粵船售買而得郴桂設卡抽稅斷無舍船運大宗之私不抽而專抽陸路零星私販之理且楚省自設卡試辦以來並未見粵商裝運官鹽到埠卡局亦未抽過官鹽之稅粵商以概設水卡謂湖南重徵課外之釐實有意預爲借

引行私地步戶部議覆廣西設局抽稅摺內有云商人借引行私船戶吞包夾帶爲鹽務錮習正不獨私販之難於巡緝蓋已早慮及之此郴宜設卡不得不兼抽船載之鹽之定局也惟粵商旣以重科爲辭溯查順治十一年部臣奏准廣西分銷廣東引鹽除在廣東納課外每引納軍餉銀九錢盤割五項銀三錢七分有奇戶部則例有每引征稅之條會典有按包抽稅之則斯皆粵鹽官引於完納正課外再議抽稅成法惟所抽軍餉盤割銀數過重或照湖南見在試行粵鹽每包抽錢八百文科算比之廣西見議餘鹽一包抽稅銀四錢八分之

則更爲輕減如粵商仍以正引重科爲辭或卽照前明兩廣總督王佐議定每正鹽一引許帶餘鹽六引正鹽免稅餘鹽收稅其夾帶多鹽許其自首仍計引納稅如隱匿不盡盤出交官治罪一條令嗣後埠商運鹽一引必運餘鹽六引而免一引之稅均經臣縷晰聲敘咨商兩廣督臣迅速酌核咨覆臣維粵鹽之行銷湖南者引地向止郴桂十一州縣今於郴桂卡局抽稅之外不復問其所之粵鹽銷路旣廣銷數日增以溢銷之鹽補正引之稅不惟楚釐得稍資接濟卽粵課亦自無短絀之虞實屬兩有裨益見當軍需萬緊粵省咨覆需時勢難

停待臣與司道覆加熟商擬卽照明臣王佐議每官鹽一引許帶餘鹽六引官鹽一引免稅餘鹽六引抽稅以杜借引行私之弊俾免影射而資接濟八月戶部覆奏臣等伏查咸豐三年六月間臣部以湖南湖北淮運中梗借運川粵鄰鹽浮費過重難期疏銷擬照明臣王守仁立廠抽稅之法令各該督撫妥議章程辦理並於是年十二月附片陳明湖南之郴桂等州向爲粵私侵灌速卽講求抽稅補救先後奏奉

俞允飭遵嗣於本年正月臣部議覆官文奏報湖北宜昌等處抽課案內催令湖南於粵私來源迅速設卡抽稅奏准

行知各在案茲據湖南巡撫駱秉章奏稱酌議每鹽一包抽稅錢七百文委員前往郴州宜章二州縣設卡試辦接准兩廣總督咨據樂桂埠商稟稱楚省於郴桂兩屬設卡以船載爲私販以引地爲越境是粵商先完正課再納課外釐金難期利運斷無有將例定界址置之不問等情該撫因檢覈疊次部議參考例案力陳郴桂不得不設卡並設卡不得不兼抽船載之鹽反覆辨論堅持定議並聲明廣西分銷廣東引鹽有每引抽稅之例擬照明臣王佐議每官鹽一引許帶餘鹽六引官鹽一引免稅餘鹽六引抽稅等語臣等查湖南一省僅郴

桂十一州縣例行粵引其餘九府六十州縣均屬淮鹽口岸自淮鹽片引不到前經籌辦餉鹽由江西分運楚南見以道阻未必運到繼又籌撥淮鹽由浙運楚以濟民食亦經奏明停止是該省官鹽久經缺乏引地盡爲私充鹽利悉爲私據此時舍設卡抽稅別無辦法見在川潞各私業經湖北抽稅辦有頭緒而湖南離川潞較遠侵灌尙少惟郴桂等處之粵私闖入最易值此官引不行各私販水陸爭趨勢所必至尤應於來源要隘急籌抽稅之法俾得化私爲官以粵鹽之有餘補楚課之不足若如該撫所奏粵商稟阻各情顯係意圖偷漏預

爲借官行私地步未便任聽該商一面之詞阻撓鹽法
所有該撫籌議郴宜等處設卡抽稅各事宜應請如所
擬暫行試辦仍令該撫查照湖北抽稅章程將征收稅
項按兩月奏報一次以憑稽核至奏稱官鹽一引免稅
餘鹽六引抽稅之處原爲畫清正引免致重科起見惟
查粵鹽行於郴桂等處額定六萬六千餘引令每引加
帶餘鹽六引卽應增行三十九萬餘引之多能否按照
此數科算難以懸擬旣據該撫咨商兩廣督臣酌核請
旨飭下兩廣總督全局通籌查照該撫咨內各情節和衷商酌
迅速定議辦理見在楚省鹽缺課虧籌辦設卡抽稅原

屬權宜補救之法各該督撫務宜不分畛域同心籌畫俾正引餘鹽均各通行粵課楚稅兩有裨益是爲至要咸豐七年四月湖北巡撫胡林翼奏湖廣兩省自淮鹽阻絕以來鹽法遂無章程惟藉鄰省商販陸續運到以濟民食此實暫時權宜之計非可恃爲久遠也查潞粵各鹽成本較昂運販止及近邊不能行遠惟川鹽一水可通成本較少是以近年兩省食鹽實以川鹽爲大宗儼與淮運相埒咸豐三年前署督臣張亮基奏請借撥川鹽引張派員督運著有成效因粵匪上竄遂未續請嗣後兩楚食鹽皆係私商運販經川省之夔關楚省之宜

昌沙市抽提課稅後卽准作爲官鹽任其所之約計入
楚之鹽以旺月計算每月約合川省水引九百餘張一
千萬斤上下此項鹽斤固未定有額數亦未給有引票
惟視楚省鹽價之長落以卜來鹽之旺衰正月開宜昌
有襄匪之警商販一月不前南省鹽價大昂民間幾於
淡食鹽之來楚與否其權皆操之商販不統於官鹽法
爲

國之大政利權下移無此政體設奸商欲操奇贏相率一
月不至民間卽鮮食鹽一旦相隨麇集先到者倍蓰獲
利後到者又復壅滯堪虞大非便民裕用之道臣等自

省垣克復後卽再四籌商擬仍援張亮基借撥川引之
案而稍變通其法改爲官運官銷仍不奪商販之利以
每月銷鹽九百引計算擬按月官運川鹽水引二百張
餘七百餘引仍聽商販自運由楚省派道府大員至川
會同川省委員按月督運仍照川省章程完納引課到
楚後另派公正委員勒限督銷其運鹽資本卽由川省
協濟楚餉內按月發交駐川委員承領運辦通四月報
銷一次其所銷鹽價並所獲贏餘一并解赴大營作爲
軍餉似此通融辦理其利實有數端楚省引地表延數
千里之大民運衰旺不常官運源源不竭價值不虞頓

長卽有缺乏隨處可通此一利也川鹽成本較輕儻經理得人則贏餘頗厚以實軍儲不無小補此二利也川省濟楚軍餉竭力供支尙虞不足茲畫作鹽本在川省所籌仍不過照向月之數而楚省所獲較豐是不增餉而有增餉之益此三利也南省米多而缺鹽北省鹽多而缺米卽令委員運鹽易米以作軍食此四利也民運七而官運其二旣非占民之利且商販得隨官運可免痞徒訛搶之虞此五利也九江之於金陵風利不過五日可至是東征之師不僅目前之挹注必以鄂爲根本卽異日之餉精終賴鄂爲轉輸鄂省一隅之地民力彫

殘餉項日絀凡有資軍餉之事幾於搜索殆盡此尤便民而不病商實可萬全無弊如蒙

俞允卽求

飭下四川督臣每月借撥楚省富順廠鹽水引二百張交楚省委員承辦並就近將濟楚月餉發交委員收領以免往返解運之煩

謹按此事試辦無效旋即停止

同治八年六月湖南巡撫劉崐奏竊臣前承軍機大臣字寄奉

上諭湖南郴州等處抽收粵鹽釐稅著劉崐查明奏請一併停

收禁止粵私入楚以歸畫一等因欽此遵卽行飭鹽法道妥籌詳議查郴桂二州屬暨衡州府屬之酃縣共計十一州縣均係例食粵鹽而永州府屬之道州甯遠等處如遇淮鹽不能接濟亦准零星買食粵鹽但不得過十斤以上並不准轉相售賣於乾隆二年奏奉

諭旨有案楚省既有粵鹽引地勢不能禁止粵鹽不再入楚其引地毘連地面卽難免時有侵灌前撫臣駱秉章任內遵照部議抽收粵鹽釐稅酌定在於郴桂等處設立局卡原以該處本係粵引應銷之地當淮引不行之日固可資其補苴卽淮引復行之時亦不致有妨礙計自督

銷淮鹽局設立之後該處粵鹽釐稅數目卽已減少大半若一律停收在湖南不過失餉源一宗接濟而粵鹽轉因不收釐稅成本更輕恐興販愈多侵灌愈廣更爲官引之累應請

旨仍准在於郴桂等處抽收粵鹽釐稅無庸遽行停止至衡州以下查緝粵私歷有成規臣當督同鹽法道及督銷淮鹽局查照辦理以期鄰私無從侵占淮鹽得以暢銷經戶部議准奉

旨允行又戶部附片奏查郴桂抽釐章程每包抽錢七百文粵鹽一引三包郴桂二直隸州屬額引六萬餘道合鹽十

八萬餘包見據該撫奏報抽收釐錢每年八萬餘串以錢計鹽不過十一萬餘包尙不及額引三分之二粵鹽入楚當不止此數其爲繞越偷漏已可想見查郴桂雖屬粵岸並無專商承辦皆係零星小販在樂昌各埠肩挑販運兩界毗連山谿小徑處處可通走私最易且自淮鹽梗阻以來湖南鹽價踊貴與粵鹽大相懸殊來往客貨難免暗中夾帶影射厚利種種弊竇皆勢所必有若不設法查禁虧短釐稅其弊猶小暗侵淮綱其弊甚大應令湖南巡撫專委幹員嚴切究查務期實力堵緝弊絕風清至初設釐局廣東曾有發給小票便於稽查

之議應令兩廣總督廣東巡撫核明郴桂運鹽如何發給照票可以稽查實在數目會商湖南巡撫妥議辦理庶於釐務准綱兩有裨益奉

旨依議欽此

同治八年十二月湖南巡撫劉崐奏湖南一省例食淮鹽地方十居六七見准兩江督臣咨會堵禁川粵私鹽停止鄰鹽釐稅自應一體遵照惟審時度勢有萬不能不通融辦理者查湖南郴桂兩屬及衡州府屬之鄱縣本係廣鹽引地所有郴桂鹽釐前已由臣奏准照舊抽收在案川粵兩省與湖南毗連地面袤延各數百里就川

鹽情形而論湖南鄰境各屬山徑阻深距川省產鹽地方較遠間有挑販爲數無多尙不難於禁遏第川鹽之關鍵在鄂而不在湘一過宜昌以下則與湖南澧常岳各屬水陸交錯隨處可通如湖北禁止川私卽湖南可以不禁自絕今湖北荆宜等處地方配銷川鹽八成其泛濫於湖南實屬必有之事川鹽口味較厚爲民間所喜食於入境及銷售埠所抽取釐金價值與淮鹽不相上下猶不致盡奪淮利且失之淮課者仍可取之川稅盈絀亦大略相同若必概行堵禁則水運恐盡易爲肩挑並湖南釐稅亦皆偷漏成本愈輕趨之如鶩數百里

地面斷難一一周防轉慮川鹽充斥淮課亦見短絀湖南越境勦辦黔匪歲須餉銀二百餘萬取給於鹽釐者爲數不少儻更失此巨款餉源易竭譁潰堪虞伏思湖北配銷川鹽原亦不得已之通融湖南軍餉較湖北尤爲竭蹶所有川鹽釐金暫時未便停收至粵鹽已入湖南境內所在侵灌與川鹽相同臣愚以爲與其存堵禁之虛名而使淮課湘餉兩受其病不如求轉移之實濟而使淮課湘餉兩不妨礙請仍照舊加抽釐金凡販賣川粵鹽斤查無釐金照票者卽以私論庶川粵商販尙可就我範圍湘省餉需亦可借資接濟似於湘鹽並無

大害湘餉實有利益經戶部議暫准如所奏俟鄂省議有端緒飛咨湖南照辦

西岸借運鄰鹽

咸豐三年二月江西巡撫張芾奏請撥運粵東熟鹽六萬引以濟民食並飛咨兩廣督臣檄行運司迅速派撥場鹽暫行通融先撥二萬引籤商委員起運來江嗣於五月經兩廣總督葉名琛奏明籌借粵鹽運交湖南江西奉

旨戶部速議具奏旋經戶部議覆查江西借銷粵鹽一案已據廣督檄行運司查明粵東各場運回省河之鹽均係生

鹽向無熟鹽卽例食粵鹽之湖南永興江西攸鎮等處所售熟鹽亦係各埠分銷鋪戶設鍋煎熬祇可將生鹽配給運往已飭運司督同先運生鹽一萬包迅速解往接濟等因應令江西巡撫查明粵省章程有無窒礙生鹽是否合用自行酌辦又附片內稱湖南與湖北一水相通見經部議湖北准食川鹽潞鹽江西准食閩鹽彼此皆可接濟較之由粵運往一切尤多省便儻該兩省因粵鹽章程與淮鹽不符窒礙難行卽由臣察看情形奏請停止借運等語查五六月間業據江西巡撫張芾以粵引未到奏請建昌一府暫行招商採買閩鹽當經

臣部核議奏准在案是借銷粵鹽及販運閩鹽浙鹽原謂彼此皆可通融儻該省督撫各懷爾疆我界之見藉詞諉卸必致官鹽借運不行私鹽易銷爭赴殊非同心共濟之道所有該督片奏俟察看情形再請停止借運之處應毋庸議奉

旨依議欽此

咸豐三年六月江西巡撫張芾奏請建昌一府暫行招商採買閩鹽旋經戶部議覆見據湖廣總督張亮基奏報逆匪滋擾淮鹽片引不到請借粵鹽二萬引以濟民食經臣部核准所有淮鹽之發販江西九江府口岸者此

時該處正值防勦喫緊恐未必能到正可仿照湖南借銷粵引奏案權宜辦理請

敕下閩省督撫江西巡撫詳查乾隆年間江西撫建二府議歸閩省原案參酌時地妥議章程具奏茲據江西巡撫張芾請將建昌一府五縣暫行招徠商販採買閩鹽以濟民食等因奏覆臣等詳核所奏內如乾隆六年部駁前署撫臣奏請改行閩鹽一案又乾隆五十六年鹽政全德覆奏不敢輕議更張一案均與鹽法志所載相符惟是建昌府屬例食淮鹽從前所以不能就近改食閩鹽者原爲保固藩籬起見本年二月該撫張芾以逆匪竄

擾下游長江梗阻商販運到需時民虞淡食奏請撥運
粵東熟鹽六萬引以濟民食經臣部核復准行在案此
時江省淮鹽依然短絀而前此撥運之粵引亦據稱未
到自未便拘泥舊例致小民有茹淡之虞惟該撫此奏
但請將建昌一府暫爲變通見在又奏請將各府均以
鄰鹽接濟情形既隨時不同則辦法自難拘執應仍令
該撫查照臣部准撥粵鹽濟銷並權宜抽稅各奏案詳
議章程迅速奏明辦理其撫州府屬據該撫奏稱不與
閩省交界毋庸買銷閩鹽並責成緝私卡員如查有照
外夾帶無照之鹽以及侵銷撫州均以私論又稱撫州

府屬應照章招商赴省領售等語該省淮鹽短絀粵引
未來無鹽可領何鹽可售名曰設卡緝私轉留此甌脫
以爲閩私侵灌之地惟見又據奏凡屬行銷淮鹽各府
均聽鄰引起運濟銷由臣部另摺議覆奉

旨依議欽此

謹按以上借運閩鹽粵鹽嗣因辦理軍務並無粵鹽
來江因而停止

咸豐三年四月江西巡撫張芾奏竊照江西南昌等十府
行銷淮鹽前因運道梗塞民虞淡食經臣會摺奏請撥
運粵鹽六萬引並咨粵省起運接濟繼復咨催各在案

今據署鹽法道王訓會同藩司陸元烺詳稱查請撥粵鹽於何日起運來江迄未接准咨會見在西岸存鹽將次銷竣待濟甚急未便稽遲粵鹽尙無到境之期若不從權酌辦殊有脫缺之虞再四思維應請廣招商販暫赴鄰省毘連各引地採買有餉官鹽運回濟銷以便民食除粵引地面業已奏明借撥未便復向買運致多窒礙外擬由道出示招徠如有士民鋪戶人等自願備貲前赴行銷浙鹽之廣信府屬及安徽之婺源祁門二縣並行銷閩鹽之光澤等縣販運官鹽售賣者准其赴道具稟指明前往何縣買鹽若干斤運至何縣地方銷售

由道給發印照并行知該縣在於官鹽店內買運該官
鹽店查明照內鹽數卽照市價公平交易填給店號發
票毋許照外多買以及串銷私鹽並備印照隨鹽護運
不准鹽照相離運入江境責成緝私各卡員弁調驗照
票查明鹽數相符立即放行不准留難在卡丁役人等
亦不得藉端需索并於照內蓋印過卡月日戳記以杜
重複買運之弊如查有照外夾帶並無照之鹽均以私
論立將人鹽解縣究辦鹽到銷售之縣該販將印照發
票一併繳縣驗明送道核銷仍由縣將運銷鹽數按旬
開報並於每月底造冊詳咨戶部備查以歸核實又查

建昌一府暫請採買閩鹽案內聲明江省代銷閩鹺係買有課之引所有應完淮課由閩省核明造報等情已蒙會摺具奏應俟奉到

硃批另行欽遵督辦惟前請建昌採買閩鹽僅係一府民食今因粵鹽未到凡屬行銷淮鹽各府均應運赴濟銷閩引浙引應聽各販自行請買俱以給發印照爲憑未便限以引地致啟梟販乘機充賺之虞事關通岸淮綱旣與建昌一府就近採買不同而各販分買濟售尤爲不便查照建昌採買之案歸於該省造報解課致滋轆轤自應飭令各販交納淮南引課藉資補苴但鄰省存店之

鹽均屬有課之引賣價已照時值若令徵淮南一切課銀則成本較重不惟各販運賣爲難羣相裹足且淮地鹽價頓增更於民食大有關係並請按照辛亥綱淮南科則以出場六百斤大鹽作爲引半完課每大鹽一引應徵報部正項銀一兩四錢二分三毫三絲七微三纖一沙二塵報部雜項銀三錢一分二釐六毫二絲四忽四微七沙八塵江西鹽規匣費徵銀一錢九分九釐七毫一絲二忽六微二纖西岸外支各款酌徵銀一錢五分又岸費銀六錢各販赴道請照時核明六百斤大鹽每引完納報部正雜各課及鹽規匣費岸費並酌徵外

支各款共銀二兩六錢八分二釐六毫六絲八忽七微五纖九沙餘概免徵期於民食課程兩有裨益販買餉鹽一律由道給照其在地方官衙門請照者概不准行仍俟粵鹽到岸及淮鹽運道疏通卽行停止等情詳請具奏前來臣覆查該司道等所議係爲暫濟一時民食起見除咨明閩浙督臣福建浙江安徽各撫臣查照外謹會同兩江總督臣怡良恭摺具奏奉

硃批戶部妥議奏欽此旋經戶部議覆臣等詳核該撫請將南昌等府屬販運閩浙官鹽事關通岸變更鹽法利弊難以懸揣但當准鹽中梗借運粵鹽又未到境若不量

予變通恐民苦淡食而課款亦歸無著應請

旨俯如所議給照販運各事宜准其暫行試辦奉

旨依議欽此

咸豐四年江西藩司陸元烺署江西鹽法道王訓議詳江
省因借撥粵鹽已奉兩廣督部堂葉以窒礙難行奏明
停止復詳採辦閩浙餉鹽蒙前憲張奏奉

諭旨允准無如數月以來招徠罔應閒有一二商人呈請承運
不過數十引或數百引不等兼之數月之久尙無一鹽
到岸推原其故緣賊犯江西相持日久重圍解後民困
未甦卽有資本之人亦皆視運鹽爲畏途相率裹足又

兩江總督奏 卷三十一
兼商民採買不過近在行銷浙引之江西廣信府及安徽之婺源等處中途轉販則成本不敷更虞虧折以致各商裹足民食既虞缺乏

國課又復虛懸查江省每歲額銷淮鹽二十七萬七千二百九十九引前督部堂陸改章減額以後亦應銷鹽二十一萬七千六百八十一引此時賊踞金陵江路梗阻淮鹽久未報到即使指日蕩平招商捆運計非七八箇月之久難以到岸職道職任督銷當此鹽務決裂之時借鹽既多窒礙招商又復觀望再四籌思除委員採買鄰鹽之外別無補救良策查江省鹽岸與浙閩粵三省

引地均屬毘連而浙省距江尤近往返轉運不過兩月
應請遴委明幹大員先赴該省採買六百斤成引大鹽
四萬引回江設局售銷以濟目前之急所有發重捆運
等事會同浙運司熟商妥辦無論嘉松杭紹四所已掣
未掣之鹽悉准採買以期迅速運售至西省見因辦理
軍務用項繁多

國家經費有常不能不酌量取費以資津貼詳奉前憲札
委候補道沈濤赴浙採辦並酌將納課售鹽津貼軍需
一切應行事宜通盤籌畫議定條款呈奉批允飭遵在
案今准沈道移知先在常山紹所採辦浙鹽三千二百

引合淮鹽六百斤大引一千七百七十五引卽日運江
濟售並奉憲臺行據沈道稟報已於二月初七日到浙
查得浙省積鹽甚多見在先儘紹所售賣庶期轉運便
捷擬以四萬引分爲十批起運如銷售較旺再將後批
提前趕運總期不誤岸食常山先買之鹽陸續趲運赴
岸只須岸銷暢旺總可源源接濟等因並據委員高純
運到鹽三百五十引由道核定價值詳准遴派素諳鹺
務官紳在於省城設立總局經理其事轉發各屬鋪販
領買分銷以冀岸有儲鹽民無淡食惟鹽有課程銷有
定額江省此次採買浙鹽原因道路梗阻淮引未能運

到爲此權宜之計暫時通融以濟民食應請先行奏咨俾彼此有所遵循不得推諉脫誤如此後江路疏通鹽不致缺乏再行察看情形隨時詳明停止採辦如市疏暢四萬引以外尙有不敷亦卽接續買運以濟岸銷總期課食兩有裨益經江西巡撫陳啟邁會同兩江總督怡良具奏奉戶部核覆議准

咸豐三年四月兵部侍郎曾國藩奏伏查

國家歲入之款鹽課爲一大宗自賊踞金陵長江阻塞致淮鹽片引不行場產堆積如山而江西湖南無鹽可售民憂淡食淮南之鹽奸民偷送賊營粵匪賤售於各口

岸大獲其利江西南路食粵私北路食賊之私鹽湖廣南路食粵私西路食川私東北亦食賊之私鹽以本來富有之物產不克設法行銷自食之而自利之而反資以爲賊之利誠可惜也伏查近年各路軍情或以鈔抵餉或以米抵餉或以大錢抵餉無非通融辦理以濟銀兩之不足臣等一軍懇

恩敕下戶部撥給浙鹽三萬引用抵餉銀由臣招徠紳富自備場價自備運腳自行運至江楚兩省而銷售之以浙省之鹽斤行淮南之引地浙省正雜錢糧邀

恩豁免淮綱正雜錢糧則虛納而虛解在戶部不以爲所撥者

鹽也仍令臣軍向鹽務衙門虛報納課掣一憑批卽與撥銀無異矣在臣軍不以爲所領者鹽也仍令鹽務衙門向臣糧臺虛報解餉掣一憑批卽與領鹽無異矣伏查上年江西缺鹽經撫臣張芾陳啟邁先後奏請借運浙鹽四萬引是浙鹽可行於淮南引地已有明證本年二月浙江撫臣何桂清咨明江西巡撫浙江各場存廠鹽斤尙多商人顧源興等情願認辦浙鹽三萬引運赴江西行銷等語是浙場存鹽之富又有明證合無仰懇天恩赦下戶部准撥浙鹽三萬引聽臣設法自運自銷於淮引口岸以濟軍餉之不足不勝企幸如果運銷暢旺有裨

軍食則可免鄰省協濟之艱可減民間捐輸之苦臣當
續行奏請添引售銷如果行銷不暢流弊滋多臣亦必
奏明停止臣爲請撥餉銀起見非爲變通鹽法起見儻
其稍損於鹽務無益於軍餉臣權衡輕重斷不敢有片
刻之回護絲毫之遷就也曾國藩又附奏臣請以鹽抵
餉如蒙

聖恩俞允則不難於到岸行銷而難於招商領運蓋緣東南數
省見當干戈擾攘之時道路多梗人心驚惶殷實之家
率多隱匿不出孰肯挾貨出爲鹽商西省去浙千有餘
里楚省去浙二千餘里有風鶴之警有虧折之虞又孰

肯挈數萬金之成本求不可必得之利若輕險之徒冒死逐利影射官鹽自作私梟臣又斷不敢招徠此輩以滋弊端招商一事殊屬不易臣之愚見欲仍以勸捐之法行之勸令地方紳富湊助成本倡首領運庶票商可期踵至在籍刑部侍郎臣黃贊湯上年奉

旨派令在江西勸捐會同撫臣陳啟邁督勸至四五十萬之多官紳交孚物望允協若蒙

聖慈諭令在於江西臨江府屬之樟樹鎮設局交該侍郎總理西楚兩岸鹽餉事務各屬紳富當可響應惟樟樹鎮以督銷爲主浙江督運事件仍須有大員總理方昭慎重

查禮部侍郎臣萬青藜才優心細辦事穩實丁憂在浙未能回籍若蒙

聖恩諭令在於浙江督辦鹽運事務必能與江西總局一氣呵成當此寇亂未平之際大小臣工或督兵或籌餉苟可自效皆當力竭血誠以圖涓埃之報況該侍郎等二人位望較崇夙懷忠悃每與臣往返函商常以受

恩深重未能報稱爲恥如經理鹽務仿唐臣劉晏成法引用士人招集紳富悉心經畫自可有利無弊至西楚兩省引地寬廣所有配引分運截角緝私等事非一二人所能督辦查江西有見署鹽法道之南昌府知府史致諤明

而能斷候補道萬啟琛精細篤慎堪以協理兩省鹽運
事件湖南有總辦後路糧臺之署鹽法道裕麟辦理團
練勸捐之候補知府黃廷瓚曾經臣等奏保堪以協理
楚省鹽運事件三萬引爲數無多而微臣欲請二品大
員兩人督理又請派兩省官紳道府四人分理者蓋有
治人無治法得其人而董之則軍餉可漸期充裕而淮
南數千里引地爲賊私粵私川私侵占者可以反而爲
官引之地不得其人董之則卽此三萬引者亦不免暗
滋流弊而仍無益於軍餉是以與兩省官紳反覆熟商
莫不謂以鹽抵餉之舉必須多求實心任事者以經理

之也儻蒙

敕部議准於鹺政餉項均有裨益五月戶部議覆臣等伏查淮南引鹽向以行銷江楚兩省爲大宗自運道不通鹽難到岸節經前署湖廣督臣張亮基奏准借撥粵鹽川鹽前任江西撫臣張芾奏准借撥粵鹽閩鹽浙鹽各在案茲據侍郎曾國藩懇請撥給浙鹽三萬引自行運至江楚兩省用抵餉銀以充軍用而濟民食等因前來臣等伏思該侍郎等一軍水陸萬數千人見在上游運道已斷餉項缺乏自應准其通融辦理俾資接濟據該侍郎奏設法招徠紳富自備場價運腳由浙運鹽至江楚銷

售以濟銀兩之不足並聲明浙江各場存厰鹽斤尙多等語臣等詳繹原奏既有益於軍餉亦無損於鹽務應如所奏辦理其運鹽條目見據該侍郎咨明到部另文核覆外至另片奏請於江西臨江府之樟樹鎮設局交在籍刑部侍郎黃贊湯總理西楚兩岸鹽餉事務並請令丁憂在浙之前任學政禮部侍郎萬青藜在於浙江督辦鹽運事務暨見署鹽法道史致諤候補道萬啟琛協理西省運鹽事件署鹽法道裕麟候補知府黃廷瓚協理楚省鹽運事件之處該侍郎係爲鹺政餉項經理得人起見均應准其照辦總期軍餉漸臻充裕而於鹽

務亦不致暗滋流弊是爲至要奉

旨依議欽此又戶部咨覆山東司案呈准侍郎曾國藩咨開竊照本部堂與塔軍門水陸兩軍分爲四枝其三枝之在江西境內者每月需銀九萬兩輸捐之銀業已告罄漕折一項亦難久支屢欲奏請大部撥款以濟急需惟念東南數省多係積疲之區大部亦無可指撥不得已奏請以鹽抵餉其中節目原奏中尙有未能一一瀆陳者茲特分條縷布懇祈核准施行等因前來查侍郎曾國藩奏請以鹽抵餉一案經本部核覆准行所有運鹽條目見據咨明到部相應按款核復查照辦理並知照江

西巡撫湖廣總督可也

一去年自岳州以下新隄起及武漢黃州下至武穴龍坪九江等處皆食賊中之淮鹽皆從賊營賤售而來本年
年在江西見東北各州縣徧食賊中私鹽

國家大利

國家引地該逆暗中奪去殊堪痛恨此次奏請以鹽抵餉意在先斷賊中之私鹽上年江西撫部院張芾陳啟邁先後奏請浙鹽四萬引委候補道沈濤赴浙辦運今已一年僅運售鹽一千一百五十引續經委員招商辦運而運銷亦屬無幾蓋緣沈濤辦理章程既納淮課又納

浙課又津貼軍需銀兩每引成本至十七兩零之多借行之官鹽太貴賊中之私鹽太賤是以行銷不暢茲奏請以鹽抵餉必須一面緝賊私一面減官價方可期其暢銷所有江西借行浙引之鹽應卽奏明停止雙課之鹽萬不能行一經停止則私販不能藉端影射等語查上年江西巡撫張芾陳啟邁先後奏請浙鹽四萬引委候補道沈濤赴浙辦運等因本部查核相符再查本年四月二十一日據浙江巡撫何桂清片奏江西額銷淮鹽因江路梗阻經浙江商人顧源興等情願認辦浙鹽運赴江西兼完淮浙兩地課銀等因奉

硃批戶部知道欽此欽遵在案茲該侍郎請將江西借行浙鹽應請停止雙課之處係爲減價敵私起見應仍由該侍郎咨商江西浙江各巡撫妥籌辦理

一淮鹽奏定新章六百斤一引每引正雜錢糧二兩六錢八分零浙鹽分杭嘉紹松四所多者四百斤少者三百七十五斤一引不等正雜錢糧多者二兩六錢零少者二兩五錢四錢不等若按淮鹽六百斤大引核算實引應納課四兩九分有零上年江西奏明借行浙引委候補道沈濤辦運卽係照淮綱之例六百斤成引以其行淮南之引地不能不照淮南之章程也此次奏請以

鹽抵餉仍照沈濤見辦成案以浙鹽作淮引每引定爲
六百斤所有浙課正雜錢糧四兩九分零見經奏請豁
免其淮課二兩六錢八分三釐卽作爲部撥軍餉之款
如撥三萬引卽抵部撥軍餉八萬兩雖難必銷售之暢
旺然盡力督辦不無裨益等語查此次請撥浙鹽三萬
引旣經奏明以浙省之鹽斤行淮南之引地照淮鹽奏
定章程六百斤一引每引正雜錢糧二兩六錢八分三
釐卽抵部撥軍餉銀八萬兩應如所咨辦理仍令該侍
郎實力督銷以資應用

一鹽法最重引地此次以鹽抵餉係照江西上年奏准

成案辦理概行淮南引地於浙鹽引地毫無侵灌惟江西奏案僅行江省境內此次則兼行湖南境內擬於江西之樟樹鎮地方設立總局江西南商販概至總局領運仿照票鹽章程給與護照於照內註明准至某處售賣如與照相離或越出淮南引地一步卽從嚴懲辦如非此項奏明之鹽或有他處私鹽侵占淮南引地者亦必從嚴懲辦等語查此款既據該侍郎擬立章程禁令已極周妥應卽照辦

一此次奏請以鹽抵餉出於萬不得已之計如稍有流弊卽奏請停止然江楚兩省淮南引地縱橫千餘里皆

爲賊私川私粵私占奪今以浙鹽三萬引行之不及額引十分之一想斷無流弊也惟事屬創行與前明王守仁於用兵而請抽鹽稅同爲一時權宜之計從前成案無可援之例鹽務各官無應辦之責見經前任刑部侍郎黃贊湯總理局務其由浙運局運楚或官運或商運或盡照票鹽舊章或畧改章程均難預定如有與定例不符之處卽隨時咨明等語查此款辦運事宜已據該侍郎附片奏明前任刑部侍郎黃贊湯六人或總理鹽餉或分理運務此後如有應行隨時咨明之處仍卽專案報部備核

謹按以上借運浙鹽用抵軍餉名曰餉鹽

咸豐七年二月前吏部左侍郎萬青藜奏竊臣前於具報服滿摺內聲明督運餉鹽已及二萬七千餘引俟運足三萬引後卽行起程回京恭奉

硃批知道了欽此查此項餉鹽前經曾國藩奏請借撥浙鹽照淮額三萬引招商認運江楚等處酌收課項接濟餉需惟查向來借運鄰鹽動多窒礙卽如前數年閒江西請借閩鹽粵鹽迄未辦動臣於奉

命之初設立省局以除弊爲先以恤商爲主凡認運各商具呈請運請掣及給發買單護照均隨到隨辦無層折守候

之煩無絲毫需索之弊商情尙無畏阻嗣因廣饒一帶
警信頻聞由浙赴西道途梗阻不無觀望停留臣節次
嚴催以速補遲自咸豐五年夏閒設局辦運起截至本
年二月止統計官商認運淮額鹽三萬五千一百五十
七引於原請額數有盈無絀見因弋陽安仁等處復有
賊擾鹽船尙多停閣俟全數到岸售銷計曾國藩軍營
扣收淮南正雜課費銀九萬四千三百二十六兩二錢
三分一釐浙江抵解曾營軍餉銀五萬六千八百四十
八兩八錢六分九釐浙省運庫酌收商餘銀一萬六千
八百七十五兩三錢六分合計銀一十六萬八千五十

兩四錢六分其如何支銷之處應由各該處分別詳報
若使道路肅清源源轉運引數尙不止此節准曾國藩
來咨擬俟原請引數行完卽行續請臣伏思當此經費
支絀之際有此自然之利不待追呼不勞撥解且業已
辦有成效既有益於西省又無害於浙鹺似應仍照定
章力籌接辦除咨商撫臣晏端書籌議具奏外所有督
運江楚餉鹽引數全完緣由謹會同督銷江楚餉鹽前
刑部右侍郎臣黃贊湯具奏奉

硃批知道了欽此

咸豐十年九月江西巡撫毓科奏督臣曾國藩於咸豐五

年閒駐軍江西奏准運銷浙鹽徵課濟餉係屬先鹽後課嗣於九年冬閒前浙江撫臣胡興仁羅遵殿籌辦皖南軍餉先後奏准援案撥鹽運西銷售係屬先課後鹽當查西岸行銷浙鹽不難於採辦售銷而難於招商轉運諸鹽務者少力能認運者尤屬無多灘河舟運固艱過山陸運更爲不易向祇西省辦運楚軍餉鹽恆以舟車難覓認運不前爲患浙省援案並舉止此運商同此運道能否增籌皖餉仍無損於楚營餉需本無把握徵課復有先後招商必致趨避兩省各自設局經費卽已增多若非安定章程必致得不償失正在兩省會商閒

杭城淪陷致未定議見在杭城久復商販漸歸江浙兩
省印委各員悉心商酌擬請卽以兩省原辦餉鹽所設
之浙局作爲西浙兩省辦運公設之浙局歸浙江管理
專辦督運事務併將原設之西局亦作爲西浙兩省公
設之西局歸西省管理專辦督銷事務所有商鹽每六
百斤成引應提餘贖抵作浙課銀二兩九分七釐於在
浙請運之先歸於浙局收繳撥濟皖南餉需其應徵淮
南正雜課費銀二兩六錢八分三釐俟到西銷售之後
歸於西局扣繳除循例畫歸鹽道支放經費銀五錢外
餘解充曾國藩楚營餉項如此合局分項協力共籌果

能道途平靖商販增多自於彼此餉需有裨卽使較前未能多運亦不致徒增糜費轉致趨避觀望臣與浙江撫臣往返函商意見相同由鹽法道鄧慶恩協理西岸鹽務事務候補道聯福具詳請奏前來理合會同兩江總督臣曾國藩浙江撫臣王有齡附片陳明

謹按同治元年浙省杭城失陷江省運道自常玉山一帶節節阻隔並無商販運銷餉鹽到江因而停止

兩淮鹽法志卷五十四

兩淮鹽法志卷五十四

鹽運司 鹽運司

三